

UEFA ევროპის საკლუბო ტირნირები

მატჩის ბედი დებიუტში გადაწყდა

„ვიქტორია“ (ბუქარესტი, რუმინეთი) – „დინამო“ (თბილისი, სსრკ) 1:2 (0:2)

ბუქარესტი. „დინამოს“ სტადიონი. 22 ოქტომბერი. 16.000 მაყურებელი.

„ვიქტორია“: როტერესკუ, კომენესკუ, ტოპოლინსკი, აუგუსტინი, ურსუ, მირია, ვაიშკოვიჩი, კოაუკარუ, კაჩურიაკი (იორდაკე, 74), ენე, ხენზელი (ცელნარი, 46).

„დინამო“: გაბელია, კეტაშვილი, ჩივაძე, ჭედია (ქეცბაია, 72), არზიანი, რევიშვილი, ცვეიბა, სულაქველიძე, კორღალიძე, გურული, შენგელია.

მსაჯები: მ. რეხნერი, ვ. აუმი, ვ. პენინგი (ყველა - გდრ).

გაათრთხილეს: ტოპოლინსკი, კომენესკუ, ენე, ცვეიბა.

მატჩის შემდეგ „ვიქტორიას“ მწვრთნელი დიმიტრი ნიკოლაუ-ნიკუშორი თავაზიანად დათანხმდა შეხვედროდა საქართველოს ჟურნალისტთა ჯგუფს. შინ წაგებული ასეთი რანგის თამაშის შემდეგ, ცხადია, ძნელია წარსდგე ჟურნალისტების წინაშე და, მაინც, მწვრთნელმა საკმაოდ დრო დაგვითმო და არც მისთვის უსიამოვნო შეკითხვების პასუხისთვის აურიდებია თავი.

- „დინამომ“ ჩვენზე უკეთ ითამაშა და დამსახურებულადაც გაიმარჯვა. ასეთ დასაწყისს არ მოველოდით. ჯერ პირველმა, შემდეგ მეორე გოლმა ყველაფერი ჩაგვიშალა. გუნდი დეპრესიულ სიტუაციაში აღმოჩნდა. „დინამოს“ კარში პენალტით გატანილი გოლის შემდეგ კი, როცა „ვიქტორია“ გონს მოეგო, საკმარისი დრო აღარ დაგვრჩა ანგარიშში სხვაობის შემცირებისთვის. სამწუხაროდ, ვერ გამოვიყენეთ შეტევის შედეგიანად დამთავრების ორი კარგი შესაძლებლობა. დებიუტის ეტაპზე გატანილი ის ორი გოლი რომ არა, სულ სხვა თამაში იქნებოდა - თქვა ნიკოლაუ-ნიკოშორმა.

მატჩისწინა ატმოსფერო საკმაოდ დაძაბული იყო. რუმინელ გულშემატკივრებს და იმ ოფიციალურ პირებს, ვისთანაც კი ურთიერთობა გვექონდა, ეჭვი არ ეპარებოდათ, რომ „ვიქტორია“ შინ უთუოდ მოიგებდა შეხვედრას. ასევე დაჯერებული იყვნენ ისინი „სტიაუს“ გამარჯვებაში და გაუმართლათ კიდევ. „ვიქტორია“ ქვეყნის ჩემპიონატში ახლა მეოთხე ადგილზეა. მას შესანიშნავი ფეხბურთელები ჰყავს. ეს ფაქტიც თავისთავად ბევრს შეტყვევებს. 20-ათასიანი სტადიონი, მართალია, მთლიანად არ შეივსო (მატჩს ესწრებოდა 16 ათასი კაცი), მაგრამ ეს სრულად არ ნიშნავს, რომ ნაკლები იყო მატჩისადმი დაინტერესება. აქ სხვა რამ იყო მნიშვნელოვანი - ბილეთი საკმაოდ ძვირი ღირს, ამას დაუმატეთ ასეთივე ძვირადღირებული საგანგებოდ გამოცემული ფერადი ნაბეჭდი პროგრამა, მატჩისადმი მიძღვნილი სამახსოვრო ვიმპელი, „ვიქტორიას“ ასევე ფერადი ფოტო... ყველაფერი ეს კლუბს სოლიდურ შემოსავალს აძლევს. ბილეთს კი ცალკე ამ ატრიბუტების გარეშე არ ყიდიან. ნაღდ

გულშემატკივრებს სხვა გზა არ აქვთ. ყველაფერი ეს უნდა შეიძინონ, მით უმეტეს, როგორც წესი, რუმინეთში არც ერთ მატჩს არ გადასცემენ ტელევიზიით. აქაური ტელევიზია დღეში სულ მხოლოდ 2,5 საათს მუშაობს.

უურნალისტები დინამოელების გვერდით ვიყავით თამაშის დაწყებამდე. დაბეჭივებით შეიძლება ითქვას, რომ ბიჭებს წარმატების რწმენა ჰქონდათ და ეს აშკარად იგრძნობოდა მათს განწყობაში. ის კი არა, ჭეღია მთელი დღე ირწმუნებოდა, რომ ერთ გოლს აუცილებლად გაიტანდა. უფროსმა მწვრთნელმა გერმან ზონინმა მინდორზე გასვლის წინ ბიჭებს მოკლედ უთხრა: ბურთს, ბურთს გაუფრთხილდითო. მართლაც, ყველამ ვნახეთ, „დინამომ“ ეს თამაში ტექნიკურად ძალზე წიგნიერად ჩაატარა და ყველაზე ნაკლები შეცდომა ჰქონდა გადაცემებში.

რა იყო დინამოელთა კოზირი ამ მატჩში? კოლექტიური თამაში, დახვეწილი ტექნიკა, თითოეული ფეხბურთელი ზუსტად ასრულებდა თავის ფუნქციას. მატჩის შემდეგ გ. ზონინი იტყვის: „მე ვერავის გამოვყოფ, მთელმა გუნდმა შესანიშნავად, ტექნიკურად, ტაქტიკურად, აზრიანად ითამაშა (სხვათა შორის, იგივე გვითხრა ჩვენს გუნდზე „ვიქტორიას“ მცველმაც). ბიჭებმა დაძაბულ პირობებში ყველაფერი გააკეთეს წარმატებისთვის. კარგად გამოიყენა გუნდმა სტანდარტული მდგომარეობა, როცა კუთხურიდან ჩამონოდებულნი ორი გოლი გავიდა მეტოქის კარში.

მიმდინარეობდა მე-3 წუთი, „დინამომ“ სწრაფი კონტრშეტევა წამოიწყო თავის საჯარიმო მოედნიდან, რომელიც ჭეღიამ „ვიქტორიას“ კარში ძლიერი დარტყმით დაასრულა. მეკარემ კუთხურზე მოიგერია ბურთი. ეს კუთხური კორღალიძემ ზუსტად ჩამოაწოდა. ბურთს მაღალ ნახტომში ისევ ჭეღია მისწვდა - ულამაზესი გოლი! მე-20 წუთი. მეორე კუთხური. კვლავ კორღალიძის მიწოდება. მცველებთან საერთო დუელი ამჯერად გურულმა მოიგო. შემდეგ ბურთს შენგელიამ მისცა გეზი კარისკენ 2:0.

ასეთი დებიუტის შემდეგ მეტოქეებმა, ბუნებრივია, თამაშის ტაქტიკა უნდა შეცვალონ, რაც სტუმრებმა უკვე შეძლეს. „დინამომ“ დამაჯერებლად, დინჯად აკონტროლებდა თამაშის პულსს და კონკრეტული სიტუაციის შესატყვისად არეგულირებდა მის მსვლელობას. გუნდმა მეტოქე თამაშის ორგანიზაციით დაჯაბნა, არ მისცა შესაძლებლობების სრულად გამოვლენის საშუალება. კარგად ითამაშა ჩვენმა დაცვამ ჩივაძის ხელმძღვანელობით. უშეცდომოდ ჩაატარა მატჩი მეკარე გაბელიამ. დაძაბულ ვითარებაში მეტოქე არაფერს ერიდებოდა. ვ. გუსაევმა ჯერ კიდევ წინა დღით გვითხრა, რომ რუმინელი ფეხბურთელები ძალიან ხისტად და უხეშად თამაშობენო. ასეც იყო. არა მარტო ბურთისთვის ბრძოლაში, უბურთოდაც ძალზე მწვავედებოდა სიტუაციები. ამას დაუმატეთ მაყურებლის დაჟინებული ზემოქმედება მსაჯზე. ფეხბურთელთა სიმულაცია (ერთ-ერთ მომენტში, როცა დინამოელთა ექიმი ზ. თელია ჩვენი ფეხბურთის დასახმარებლად მოედანზე შევიდა, მეტოქე გუნდის წევრი წინ ჩაუდგა. თელიამ ხელით აგრძნობინა გვერდზე გადევნიო და... ის ფეხბურთის

მოედანზე გაიშლართა, ზეზე არ წამოდგა, ვიღრე „სამედიცინო დახმარება“ არ აღმოუჩინეს. არბიტრმა დინამოელთა ექიმს გასახდელისკენ მიუთითა.

მსაჯმა უცნაური გადაწყვეტილება მიიღო მაშინაც, როცა ძალზე საეჭვო პენალტი დანიშნა დინამოელთა კარში. არბიტრზე აშკარა ზეგავლენა მოახდინა მინდორზე და ტრიბუნებზე შექმნილმა დაძაბულმა ატმოსფერომ. გოლის გატანის შემდეგ მასპინძელთა უხეშობა არ შეწყვეტილა. მსაჯი მხოლოდ ამის შემდეგ გახდა იძულებული მონოდების სიმალლეზე დამდგარიყო. თბილისელებს ამ გამარჯვებით შინ განმეორებით მატჩში წარმატების საუკეთესო შესაძლებლობა გაუჩნდათ.

„ვიქტორიას“ მწვრთნელმა ჩვენთან საუბარში, როცა მომავლის გეგმებზე ჩამოვარდა სიტყვა, არაორაზროვნად თქვა: ნავაგეთ, მაგრამ ნავაგეთ ერთი მატჩი. ასე რომ, ჯერ ყველაფერი არ დამთვრებულაო. იგივე აზრი გაატარა ჩვენთან საუბარში დინამოელთა მწვრთნელმაც. მატჩის შემდეგ დინამოელები თბილისელმა და ადგილობრივმა გულშემატკივრებმა ტაშით გააცვილეს მინდვრიდან. სტადიონთა გასასვლელთან კი დინამოელთ ავტობუსს უამრავი რუმინელი გულშემატკივარი ელოდებოდა. ბევრნი გამარჯვებას ულოცავდნენ ჩვენს გუნდს. აეროპორტიდან თბილისის „დინამო“ სამშობლოში რუმინეთში სსრ კავშირის საელჩოს წარმომადგენლებმა გააცვილეს. მატჩის წინა დღეს თვით საელჩოში გულთბილი შეხვედრა მოუწყვეს ჩვენს ფეხბურთელებს.

თენგიზ გაჩეჩილაძე

„ლელოს“ სპეციალური კორესპონდენტი

ბუქარესტი - თბილისი.

P.S. გუშინ, დილიდანვე გაზეთ „ზარია ვოსტოკის“ შენობის ვიტრინასთან უამრავი ხალხი იყრიდა თავს. აქ გამოფენილი იყო ბუქარესტში დინამოელთა წინა დღის მატჩის ამსახველი ფოტოსურათები. ესეც ერთი სიკეთეა, რაც გუნდთან ერთად მატჩზე ჟურნალისტების გამომგზავრებას მოჰყვა. საქართველოს სპორტულ ჟურნალისტთა ფედერაცია მადლობას უხდის საქართველოს ალკკ ცენტრალური კომიტეტის ახალგაზრდობის საერთაშორისო ტურიზმის „სპუტნიკის“ ხელმძღვანელობას მატჩზე რესპუბლიკის მასობრივი ინფორმაციის წარმომადგენელთა გამგზავრებაში ხელშეწყობისთვის.

“ლელო”, 24.10.1987